

15 MAI

**ACATISTUL
SF. CUVIOS
ARETA
KATARGHIN
DE LA
VERHOTUR**

ACATISTIER-RU



Акафист преподобному Арефе Верхотурскому

Кондак 1

Возбраннѣй нашего спасения поборниче,
изряднѣй благовестниче веры Православныя в
земли Сибирстей, благочестие в сердцах чад
Божиих усердно всеявѣй: ныне престолу Царя
славы Христа предстоя, о нас молися, еже
стяжати нам огонь любви негасимый к Богу и
ближним, и молитвами твоими от всяких бед
избави нас, зовущих ти:

Радуйся, Арефо, о нас молитвенниче к Богу
неустанный.

Икос 1

Ведомый Божественным промыслом, от юности
дом родительский оставив, преселился еси на
остров Валаам, и тамо положил еси начало
подвигу иноческому. Последи же многими дары
небесными украси ты Создатель Господь:
скорбящая души утешати, ожесточенныя сердца
умягчати. Ныне же сотвори молитву о нас

недостойных, чтущих любовь твою, да
сице тебе возгагодем:

Радуйся, из детства возлюбивый благодать: /
радуйся, от юности оставивый плотское
мудрование.

Радуйся, в обители Сергия и Германа
вселившийся: / радуйся, тамо смирению и посту
научившись.

Радуйся, подвигов отцев валаамских
ревнителю: / радуйся, послушаний
многосложных исполнителю.

Радуйся, надменность ни во что же вменивший:
/ радуйся, Богу и братии смирением угодивый.

Радуйся, Антипы, старца дивнаго наследниче: /
радуйся, Иисусовы молитвы неусыпныя
источниче.

Радуйся, иноческое житие на острове начавый:
/ в земли Уральстей благодать обильную
стяжавый.

Радуйся, Арефо, о нас молитвенниче к Богу
неустанный.

Кондак 2

Сила Божия укрепляше тя, отче преподобне,
егда молитвою, бдением и постом подвизался
еси на острове: но Господь-Промыслитель
дарова ти ино место во спасение, и последуя

совету Иова архимандрита, Валаам оставив, вселился еси во обитель Верхотурскую, идеже в неуста́нном труде пребывая, и искушения препобежда́я, единому Богу воспевал еси: Аллилуйя.

Икос 2

Ви́дя душу твою́ чи́сту и желание послужити в ангельстем чине Христу, наставник твой Иов напра́ви тя в обитель Верхотурскую, идеже и доныне почива́еши мощьми́ своими, отче Арефо, вознося за нас молитву непрестанную ко Господу. Темже мы благодарно зовем ти: Радуйся, к добродетелям иноческим душу устреми́вый: / радуйся, сладость молитвы и поста вкуси́вый.

Радуйся, смирение послушанием воспита́вый: / радуйся, место подвигов новое избра́вый.

Радуйся, яко в Верхотурье пришел еси благословением: / радуйся, приял труды в киновийномустро́ении.

Радуйся, все упование на Богоматерь возложи́вый: / радуйся, Сыну Тоя́ усердно послужи́вый.

Радуйся, прие́мый с кротостию диа́конский сан: / радуйся, устрой́ый порядок по архивным делам.

Радуйся, нравом тихим, безмятежным украшённый: / радуйся, яко от рук Христа все послушания приёмый.

Радуйся, Арефо, о нас молитвенниче к Богу неустанный.

Кондак 3

Сила Божия укрепляше тя, отче, егда подвижа́лся еси в посте и молитве, в труде неустанном и бдении, всякия искушения препобежда́я: возложив упование на Творца, истинный проповедник любви Христовы явился еси, братии и всем притека́ющим в обитель. И ныне предстоя престолу А́гнчу, со всеми избра́нными пое́ши Богу: Аллилуйя.

Икос 3

В прише́дый час отыде на покой отец Иов, и возврати́ся в обитель Валаамскую: отцы же верхотурския в первый раз избра́ша настоятеля себе из братии, единомудшно пожела́вше видети пастыря иночествующим то́кмо тебе, благонравный Арефо. Сего ради Господа сла́вяще, воспеваем ти:

Радуйся, небесным покровителем от юности не оставля́емый: / радуйся, Творцом ко пастырству

приуготовляемый.

Радуйся, на праздник «Спорительницы хлебов» сподобивыйся рукоположения: / радуйся, от Господа почтенный даром рассуждения.

Радуйся, иго настоятельства с кротостию на раму восприемый: / радуйся, крест свой в руке, яко знамя, вземый

Радуйся, прибегающим к тебе отец чадолюбивый: / радуйся, желающим спасения усердно послуживый.

Радуйся, братию любовь своею покрывай: / радуйся, приходящих к тебе не отвергай.

Радуйся, наставниче, сердца управляй к небеси: / радуйся, проповедниче, умы питай словесы.

Радуйся, Арефо, о нас молитвенниче к Богу неустанный.

Кондак 4

Буря треволений житейских не возможе поколебати благое житие твое, наставниче Арефо, явивый любовь нелицемерную, в молитве неотступность и твердость в воздержании, и ревность велию духа твоего, соделався стена крепка обители твоей. Темже подвигом твоим дивящися, братия прославиша Христа, мы же со усердием воспеваем: Аллилуйя.

Икос 4

Слышим и веруем, яко многоцѣнны явишася пред Го́сподем труды твоя: ты бо книгами духовными обогати́л еси обитель, и управил еси по чину архивы, и на ниве просвещения трудился еси, двухклассную школу устроив, ныне же твоим успехом ра́дующеся, песнопения тебе приносим и молитвенно взываем сице: Радуйся, заповедей Божиих исполнителю: / радуйся, невидимых врагов победителю. Радуйся, в землю Сибирскую Богом призванн́ый: / радуйся, во утешение нам дарованн́ый. Радуйся, не отступив́ый устава общежительнаго: / радуйся, училище устроив́ый при обители. Радуйся, де́тем малым и неиму́щим послужив́ый: / радуйся, закону Божию тех учив́ый. Радуйся, приобрета́ый книги богомудрыя для бра́тии: / радуйся, в делах образования внимательный. Радуйся, постом душетле́нныя страсти умертвив́ый: / радуйся, до конца себе смири́ый. Радуйся, Арефо, о нас молитвенниче к Богу неустанный.

Кондак 5

Боготечней звезде уподобился еси, угодниче Божий Арефо, многих к свету Истины приводя поученьми своими: сердца писа́вших тебе утешал еси, ни еди́наго забывая от скорбных, твоих наставлений и заступления праведного Симеона требующих. Сице и ныне не преста́й возносить молитвы твоя о чтущих тя и Богу поющих: Аллилуйя.

Икос 5

Видеша ты братия дивнаго подвижника, смирения и кротости исполненнаго, егда подъя́л еси тяготы́ настоятельства, общаго жития устав во обители насаждая, и братство иноческое укрепля́я. Мы тебе, за благоуправле́ние искусное в сан архимандрита возведе́нному, похвалы приносим сицевы́я:

Радуйся, иго Христово, благое и легкое, возлюбивый: / радуйся, собою иноком пример явивый.

Радуйся, о нестяжании обеты соблюдавый: / радуйся, довольство всяческое во Христе стяжавый.

Радуйся, на письма отвечаваый пастве со усердием: / радуйся, нас богомудро научаяй милосердию.

Радуйся, добродетелей пространное селение: /
радуйся, тайных подвигов исполнение.
Радуйся, от Бога предузнавый день кончины и
час: / радуйся, не престай донныне удивляти нас.
Радуйся, надеждою, любовью и верою
окриляемый: / радуйся, терпением гобзованно
укрепляемый.
Радуйся, Арефо, о нас молитвенниче к Богу
неустанный.

Кодак 6

Проповедника Слова Божия стезю шествовал
еси, отче наш Арефо, потщався просвещати
люди словом, делом и молитвою о них твоею, и
тако воспитав братию и жителей окрестных.
Явишася тогда с упованием на милость Бога
неизреченную, странствующих поток в пределы
Верхотурския. Ныне же и нас научаеши взывати
Богу чистым сердцем: Аллилуйя.

Икос 6

Возсиял еси, яко звезда пресветлая, людям
страждующим: мужие бо, жены со младенцы,
старцы с юнотами, богатии и убозии, к тебе
притекающе, утешение обретаху, яко правило
себе положил еси, да никто же отыдет от тебе не

утешен. И благим житием любовь пасомых приобретёт, ныне прие́млеши от нас похвалы таковыя:

Радуйся, не земных наград иска́вый, но вы́шняго спасе́ния: / радуйся, о тленней пище отложи́вый попече́ние.

Радуйся, образе равноа́нгельнаго жития́: / радуйся, зате́пливый ду́ши чад теплотою души́ твоея́.

Радуйся, настоятелю, путем единым Марфы и Марии проше́дый: / радуйся, любовь Христову к челове́кам ве́дый.

Радуйся, даже до кончины не оста́вивый молитвы труда: / радуйся, твое бо житие не утай́ся, яко полново́дная река.

Радуйся, киновии́ иноков мудрый настоятелю: / радуйся, наставлений пастырских пода́телю.

Радуйся, от гнева и печали наше огражде́ние: / радуйся, земли Уральския́ благое украше́ние.

Радуйся, Арефо, о нас молитвенниче к Богу неустанный.

Кондак 7

Хотя Человеколюбец Господь укрепити твое усердие к братии, разумением книжным одаритя: имея бо велие попечение о писа́ниих душеполезных, разшири́л еси книгохранилище

монастырское, дабы братия обретала еси в чтении силу и мудрость. Озаряема и ныне светом духовным, радостию воспеваает Богу: Аллилуйя.

Икос 7

Новый наставниче монахом, отче Арефо, принёс еси в обитель вся сокровища души любвеобильныя и разума пресвѣтлаго, сего ради труды твоими благоустроение монастыря и благочиние молитвенное зело прехвально бысть: да иночествующих житие послужит ко просвещению премногих, да кийждо сие воспет тебе:

Радуйся, многих к вере истинней приведый: / радуйся, венец бессмертия ныне обретый.

Радуйся, на ловитву человеков предизбранный: / радуйся, в трудех подвижничества испытанный.

Радуйся, просиял еси тишиною духа и мудростию: / радуйся, яко стяжал еси богатство велие скудостию.

Радуйся, сердца мятущихся и скорбных успокойвый: / радуйся, всех иноков на лад молитвенный настройвый.

Радуйся, в учителя Творцом поставленный: / радуйся, Богородицею в попечении не

оставленный.

Радуйся, юных к целомудрию возведение: /
радуйся, в старости и немощи подавай терпение.
Радуйся, Арефо, о нас молитвенниче к Богу
неустанный.

Кондак 8

Странника и пришельца быти в мире сем себе
помышляя, о богатстве земнем попечение
отложил еси, и всякое стяжание суетное себе
возбранив, поучал еси образом жития своего,
кротостию обилие благодати утаевай. Не
пусти убо и нам унынием воздремати, но
сподоби купно со святыми воспевати Богу:
Аллилуйя.

Икос 8

Весь Божественная любве исполнен,
преподобне, и сияя пред человеки, славно
потрудился еси во устройении обители
множеством всяческих дел: зданий и ограды
каменная сооружением, иконная и книжная
продажа расширением, и прочими труды
твоими. Мы же, видя твоим усердие, и милость
Божью, воспеваем сице:
Радуйся, обитель стеною камня и молитвы

оградивый: / радуйся, начало возведению собора положивый.

Радуйся, к тому привлек еси благоукрашителей: / радуйся, здания во еже чад учить возведый в обители.

Радуйся, сребра на благолепие обители не пожалевый: / радуйся, славянской Библией от начальства награжденный.

Радуйся, хозяйство монастырское устроивый преудивительно: / радуйся, питаый нищия в твоей обители.

Радуйся, со всеми кроткий собеседниче: / радуйся, любимый братиею наставниче.

Радуйся, во бдениях молитвенных учителю предивный: / радуйся, в щедротах милости неистощимый.

Радуйся, Арефо, о нас молитвенниче к Богу неустанный.

Кондак 9

Все естество ангельское и человеческое Богу воздаде хвалу, егда ты, отче милостиве, чад, страждующих от глухоты неисцелимыя, и не могущих словесы ко ближним обратитися, училищем особым одарил еси, да словом Божиим питаются, мы же благодаряще Бога, милосердием тя наделившаго, вопием Ему: Аллилуйя.

Икос 9

Ветий многословеснии не возмогут изреци всю силу любви твоей к чадам глухим и гугнивым, родителей не имущим, их же делом и словом приводил еси к познанию Истины, да и тий, в возраст пришедше, поминают заветы праведныя. Темже и мы, труды твоя прославляюще, во умилении зовем ти:

Радуйся, предобрая отрасли своих родителей: /
радуйся, жития по заповедям Божиим учителю.
Радуйся, всегда ко Господу о помощи взывай: /
радуйся, Тому молитися непрестанно научай.

Радуйся, ученики терпением воспитавай: /
радуйся, в их нужды заботливо вникавай.

Радуйся, любовь пастырской нас утешай: /
радуйся, милость Владычице к нам приклоняй.

Радуйся, в скорбех терпению Христову научивый: /
радуйся, в трудах усердных душу положиый.

Радуйся, земное ни во что же вменяй: /
радуйся, паче неже о теле, о душах пещися наставляй.

Радуйся, Арефо, о нас молитвенниче к Богу неустанный.

Кондак 10

Спасти хотя́ща всякаго человека, Бога молил еси, отче, да всех приходящих к тебе, на путь спасения наставит: не могу́щих же посетити тя, архимандрита Верхотурского, денно и но́чно письмены́ вразумлял и утешал еси. Темже и мы моли́тися не обленимся, и плоти утесне́ния не устрашимся, и воспоем Творцу: Аллилуйя.

Икос 10

Сохраня́я в сердце слова Спасителя: дадите, и дастся вам, устремился еси житием своим подражати Христу, сиянием духовных словес твоих пробуждая спящих во зле, возжигая сердца уны́лых. Ныне убо слезы наша приложи́ на радость, приемля от нас сицева́я:

Радуйся, в твоих писаниих предивный советниче: / радуйся, растерза́вый сети лени и любоче́стия.

Радуйся, к трудо́м на ниве Божией путево́дителя: / радуйся, невоздержания и самочи́ния обличителю.

Радуйся, потаенный подви́жнике и мудрый нестяжа́телю: / радуйся, о братии небесный ныне назира́телю.

Радуйся, о летописи монасты́рстей попече́ние яви́вый: / радуйся, Евангелием тьму растущего

безверия осветивый.

Радуйся, сирот и вдовиц словом утешаяй: /
радуйся, своим примером брата вразумляй.

Радуйся, путем иноческим ко спасению
прошедый: / радуйся, узкими врата в рай
вшедый.

Радуйся, Арефо, о нас молитвенниче к Богу
неустанный.

Кондак 11

Имуще ти строгость к себе, к другим же велию
милость, откры тебе Создатель час твоего
исхода. Темже убо в праздник Вознесения
Господня, по причащении, руке свои омыв, рекл
еси братии: менее будет вам трудиться по
смерти моей. Мы же, дивящися твоему о
ближних смотрению, с сонмом святых
Екатеринбуржских ныне воспеваем Богу:
Аллилуйя.

Икос 11

Яко светильник Небеснаго света в земнем
житии, рекл еси Михаилу, келейнику своему: се,
смерть моя прииде. И тако, знамением
крестным себе осенив, и всех благословив, руке
мирно сложил еси, душа же твоя боголюбивая в

царский чертог нетрудно оты́де. Сего ради, о твоём блаженнем успении радующеся, вопием ти:

Радуйся, сам себе омы́вый ру́це пред конце́м: / радуйся, рекий: простите мя, обраща́ясь ко всем.

Радуйся, небесный ко Творцу предста́телю: / радуйся, поющим тя благих пода́телю.

Радуйся, подвижниче, в молитвах возраста́вый: / радуйся, коленопреклонения многие соверша́вый.

Радуйся, горение и ангельскую чистоту стяжа́вый: / радуйся, успением тихим святость показавый.

Радуйся, трудом, молитвою к отходу угото́вленный: / радуйся, блаже́нныя кончины Богом удосто́енный.

Радуйся, близость отшествия духом предуве́девый: / радуйся, ныне обители небесная насле́дивый.

Радуйся, Арефо, о нас молитвенниче к Богу неустанный.

Кондак 12

Благодать и радость духовную дарова́ нам
Господь на праздник Преображения Своего, егда́
уведеша вернии о честне́м обре́тении мощей

твоих, угодниче Божий Арефо. Темже прославление твое в лице преподобных воспевающе, потщймся всемерно подражати добродетелем твоим, и преображённным сердцем радостно зывати: Аллилуйя.

Икос 12

Поюще теплое твое предста́тельство и скорое заступление, ублажаем тя любовью, яко молитвенника о нас пред Богом. Ты же наста́ви нас на путь спасения, да сла́вляще пред ра́кою смиренномуд́рие твое и кротость, с ревностию о Бозе во умилении зовем ти:

Радуйся, Божественная благодати чистая струя:
/ радуйся, яко вси тя почитающия, наде́мся на тя.

Радуйся, в блаженней нищете и простоте спасённый: / радуйся, в обители воссозданной мощми́ явленный.

Радуйся, на све́щнице поставленный светильниче Ура́льския земли: / радуйся, новый образе духо́вной чистоты.

Радуйся, от Бога увенча́нный бессмертия венце́м: / радуйся, яко к мощем твоим с любовью теце́м.

Радуйся, в незлобии святому Симеону подража́телю: / радуйся, честных монахов

воспита́телю.

Раду́йся, со старцем Или́ей на небеси́ лику́еши: /
раду́йся, сердца́ тебе молящихся врачу́еши.

Раду́йся, Арефо, о нас молитвенниче к Богу
неустанный.

Кондак 13

О премилостивый и кроткий отче наш Арефо!
Приими́ сие малое хваление, и моли Господа, да
исцелит нас от всяких неду́гов, да свободи́т от
скорбей и наветов вра́жиих, да утвердит нас в
крепости веры и де́лех добрых. Умоли́, отче
преподобне, Человеколюбца Христа, да простит
нам вся согрешения, и да сподобимся в
страшный час смертный твоим заступлением
насле́довати Царствие Небесное, и в радости
блаженней воспевати Богу: Аллилуйя.